

Kotavaxak dem suterot

J.-H. Rosny Aîné

**XIPEHUZ TISIK**

*Berpotam (1887)*

*Kotava, tela tamefa golerava*

**KOTAVAXAK DEM SUTEROT**

**J.-H. Rosny Aîné**

**XIPEHUZ TISIK**

*Francaçaf berpotam (1887)*

**Kalkotavaks : Damien Etcheverry (2014)**

*J.-H. Rosny Aîné : belgaf suterotik (1856-1940)*

# ***TANEAF DOV***

## **I : Tazukinda**

**Darekeon**, decitdon abdi tuseltayasa wicapa lizu Ninuwa az Babilim az Agmatana kaikion gepoyteted.

Pcexu alizmonaf grelt, do intaf astoleem isu okoleem isu bonoleem, va Ksur volokafo aalxo, moni titawaltara, koe ploda dem dadafa olya, remlanir. Nomdank adeer, azenter, va yona tamafa begama ticustir.

Kottan tir legapaf nume guamlitar, aneyason va sentanya lize grelt va baerdaf tey rovanteyatar aze va sielestura rotegaratar aze bravon ice ficik kadime jontolaf stirk ke keraf reliezak rokenibeter.

Rujod tumulkukawed, bidgasa coyunta van zideem lutced, mielaf lorik va kovdas dank suked, voxe grelt wan lanir. Abdurubasik tcepason dimlakir, dakteson va senta is lava, va karafa klita.

Grelt baron kizoyupur ; kottan loon kalion abdulanic, rumeafa kipera malstid ; dace kot okol isu astol, gigildas va borefa vukira nope dimlapira ke rubasik is vankievera ke alizmonikeem, olukon takamadad.

Senta awir. Mempesa klita va tij is luca gu intafa kelda fer. Tacukaca pu alizmonikeem va int nedir.

Taneon, ivamupu dem faltamaf is remafif fey dis va ticon

uul, krotc ke kot fey tis vas mon lik ke ayik. Konake aftafe tride is konaka orikafa tiora va sinafa welma ciaed ; omava ke kot fey va jebes bitej nedir.

Kaikeon, bada, lion divulafa, xuon madawed, oltavackafa gu almuk ke cirdata is umicakirafa gu jonksevas fralek. Dere tigid, batlize ik banlize, riwe akintafa tazukinda, ison gedrapafa, lanyona tigafa is ontinafa, aryona omafa is alnafa, kota iyekotukafa is vrafukirafa gu kuse, kota disa va adalafu afiu, dum bada.

Grelt woltendan kaldisuker. Broyesa kivara va telyon budik titicker, i wan laumasa viele tazukinda vanmiea lukoptafa izga ke senta toz dzavewed. Aze levgon, bitej skotced ise darunted, fey tuabrotcawed, akinta is bada dum lava mimana mo teyka lorad, kotcoba va alizmonikeem kaliapon vannir.

Grelt, kodiwan gan bata disukexa, me zekar, wan disuker. Tazukinda domud. Gla tir mayakafa. Gejikye is ayikya is rumeik, milinde gan xango ke gleba bulon zo co-tazed, mo sid ke aalxo zulzulon atitsud. Bam, ozgodafa eafuoca va po is wilteem ta tuzafa yatera pu moblisikeem dimzilir. Nume tazukinda, taneon flavakorafa is emon vuyuna, va sint anam grelt tcastad, volsaason ebiduson va kot otesik. Kultafa dilfura, wori, me tir gojupekasa : va konaktan atar, va konak artan spikonar, meviele bakar. Konaka kerafa belaxa mal pezolk ke yon ilblisik iku ita iku oblaka bimiled, vexe kotar ayik, dokotaf, fure mangir aze tacukon gin vultar, koe nomafa tupaokawera.

Nekev intafa merogotuna tuwava, dum tisik vols ra, tazukinda tegid kire, dum tisik, tid voltaniafa is gedrafa gu nira,

tire narason va intyon kosik is megojeson va alizmonik gu ruxa ok dace sulem.

Fure tel lokaliaf ayik pestaled da mea zo onkad. Cuerses is sollipayan, van zultaca adim roverwoded. Ileon wale izgan ulim, draydesa onkara wan dilizer. Ise tazukinda va gejik lodamon tcabaned aze staked voxex va axik ik ayikya ik rumeik loviele ikudad.

Batinde, iluon, koe varaf miel, nakila tir voltuwavafa, loon selusa va kota bartafa kerava. Gejik gire fu yated. Vexe aldafa dizvera azavzar : lecen, va bet otesik, *kaike titickafa kima tazukinda ten onkad*. Nume, nek legaf, nek povwaf, nek krezezes, kosik zo isker batvielu bata rietavafa jowa zo zomer, nume beta iyela kaikeon vukir.

Bata karavaldasa katcalara, fure gruyena gan alub-sanoya bifa, va bolaf nogleem ke kot otesik tuaular. Sin va dositik divvawayas va stakera isu ayikya isu kimtaf ayoc roveded. Ison, lantan, sinaf gradilik, taneon tuficayan is ciwayan gan volaye ke stuva, va gandira ke intafa glogapa dimdir, va teyxox anteyar, ta nyapera va otesik ayadolnolur.

Bam, tantanon, kintik artlanid. Jontik, minkedaf, moe nubeem va int impadimad. Nazbeakirafa ayikya, kan merosekiano gadikyafo po, va intafa enga rem ciwan rand al sud ise al kabelcad ise al bured. Aze jontik astol isu okol isu jaftol, tuoviskan leon dam ayik, dimawid.

Grenyaf mielcek, tiskin koe amlit, mekenibes, lize gejik va skotcera ke intaf putceem trenon pestaled. Vexe toz afizar,

zvon rem toemap, aze vanawaltafa lexa dem kseva is taulesisi zveri artstir ise koldar enide kottan di blir ise va eaftaceem ke mielak aloyar.

Gradilik, i tuwavaf okilik, lospalospason belcason va tari, va grelt toz patar. Lik ke gejikeem, tol-decemoy va rozara graded. Drasura va yona ayikyva tir loon abica ise tela va rumeik tir vuga.

Arti bata otulara, viele rembures bonol al zo kabelcad ( jontik graded, yoke vamoeuca ke wayeda kapbure ova bak kota otcera ), Gradilik va grelt kare gubefa vura deraykar, aze, benplekuson da kottan ker, antaf is zwaf va senta vanlanir. Metan, dace ileon, roveradimlanir.

In vanlanir liz aal leote tigid, aze va kima darevielon dizveyena kaiklanimir nume disuker.

Sumeon, koe fedafa remawisuca ke gazda, listafa klita traspur ; moe domegeem, belcaf tacukaf milk dem tazukinda drayder. Sinafa kseva al arapeniwer. Fey tid loon elkaf, sinafa frolgukafa bia al tukusawer ; akinta kadulon aotcewed ise bada va ketaf lut vektad. Vexe olya ke bitej va kota tazukinda kostid, i baalpesa dace reme afizafi afi.

Artazukera va canak ke koti tacukafi koeti dere tikir : fey akintakoron atcewed, akinta vokewed, edje bada pakon tulivawed.

Vexe, dum darevielon, levgon tazukinda toz dzavewed, sinaf bitej toz sionad ; Gradilik, vion, va giwasa jowa dimon

vomlanir.

## II : Baerdafa brinuga

Pcexu grelt lente tuvel ke alizmonafa dopewapa vukir lize ant okilik kolanid. Koe artexo kotrafo gu koca, valeve ayedikyefa ewava ke awalt, baroy gertapik tigid. Valeve sin, moe moavayafa eka, san-toloy pinotaf wetasik.

Gradilik abdulnir, va eaftafa remlanira va Ksur aalxo pwadecker, terektanon gan gorestapaf is gevan gertik gildas va tuaxara va intafa gijarotiuca lente bata merotenvana stuva.

Ilamaf gertik diner da grelt pu Awalt va san-toloy jaftol is peroy astopol is baroy okol firvir. In kagruper da tazukinda va yon loraf pilkovoy did, aze, vani wetara, va baerdafa brinuga gorar.

Kot gertik isu okilik ke Zaxelal cos fu gotcoked.

Nume staksik va yona venta isu azeka exuled, kale decemoy *lieue* solumolk aname xo lize diolikafa Agmatana enekeon zo kolnatar. Kotlize ozgodafa rupa va im ke ayik rar, kotlize okilik va gertafa rozara ekeyuson veged.

Langazdon muvugalon, Awaltye va rujod remrur, va dopewa perdoer, va muxelk zomer lize forteyasa takra ke jaftol vikizar. Gertapik is vikeasik, i alub-sanoy greltokilik, xultuson kizoyud. Vuntoy alizmonik, diveon, sistason va fedafa zarenda, va kievera toliegad, vodjuson va socelanafa taka van sustemeso

Ksur aalxo. Abditaks tir kuvaf.

Bam, do kabdueon gertik, kotafe sane rem aalxo lanir. Bak kiel, moni bare bartiv, gradilik ke PceXu va tari azavzar. Sentapa tublakerana gan muvugal, dem tcalist dem agafa toa preyutasa va tij, ilamkon stokewer ; gertik va aneyana is gosontena is govandilina coba moe doma ke klita kozwid, i va yona tazukinda. Sina tid zijnafa bene disukera, leve aalafa izga, dem skotces nideks is karaf tey ke intaf bitej, ton aulafa towara drume klita.

— Batlize, ~ ilamaf gertapik kalir, ~ va wetara gofirvit enide sina gruped da va int gu sinafa gjarotiuca levplekut !!

Kot guazik blaganyad. Puda madawer, wori. Tir Yucik, ke Nom grelt, i jotaf patasik va koca, i zwaf katcilaf rubasik dem tozifa sposuca, pirton erus da va tazukinda loon vanlanid.

Vexe guazik, tubatakayan koe yamba va proyafa ewa, xultud : muxelk zo vevedur, kosik zo vanstar, i baalpeSe okolye sotise ilamtaf zanisik va ayik. Bam, koe amlit is pirilera ke sane, iyekotaf wed va oluafa takra ke sulem trasir. Temarapa madawer. Aze gertapik :

— Kas zo vandilic, ey lorik ?

Banlize, vanmiae amlitaf ulim, tazukinda wan pridud, va int afigasion, abdualbason va runda liz awaltara lodekemon traspur.

— En, en, ~ seramik iegar, ~ sin zo vandilid !



Aze konariyison va idulafa takra ke okol, teka gertapik rilitalf va tanoya ewa tiyar, Yucik ko senta iper. Konak ukik, evieson, radimlanid. Vion, tazukinda dzavewed, va sint belcason drume sid, aze, levgon va rulokikeem iped, nume arubana stakera va alub-sanoy grelt kovudar.

Tevoy ok peroy otesik, askifoapason, elodenon onkan, va kima lajuvomvulted. Kotar al blir is don Yucik.

— Tid volrokeldaskin lorik ! ~ gertapik fawokon kalir.

Aze pirdot kabelcawer, i mokraf pirdot ke gertapikeem is abdigadikeem is okilikeem.

Sin va conyukara va nukanambe kaike giwasa kima gorad, ise ta gotura va bate anambe poad da levetirik gan tazukinda caneon zo laxudilfud.

Aze batcoba zo skur. Dratcenon gu xonukara, levetirik va anambe kolanid. Wori, oye donafa xelkara vug xonukad. Jowa re tir acon exoneyena, turowinana pu kottan kan nukanambe.

Batinde baerdafa brinuga fikunton tenuwer, nume Zaxelal saneik gu bat rukuzaf volnik zo fokekaldendad.

### **III : Mielak**

Vexe djis bolk ixulen gan pirdot, fure nijur merotaskis. Direimwugalon, Xertot grelt isu Nazum, pokolanison va nukanambe, merodaxason is tcastamon, gan yona tazukinda

uduton zo ruzaded nume zo tsalad.

Okilik divvawayas va stakera pu Zaxelal pirdotap pwaded da tazukinda re tigid loote dam daremuvugalon. Soe, dum daretomon, va onkara kimad, vexe jowa al zo tumantad.

Bat warzot va sane yondad : sugawalkap is yona wetarapa dilized. Azon, pirdot gorar da kan tey va Ksur aalxo di govilar.

Damo konaka yawara, ant dom zo lajufirder.

Bam, gripokolen gertik va aalxo ziliyad ise kalpoud da kottan kolanir. Aze konak idulugal tiskid.

Lanmielon saneaksaton, kenibeso pemaxo ke Zulf grelt, arte sanoya trasoluma male baliafo aalxo, gan yona tazukinda zo tolgenir. Ware bar-decemoy gejik blidrasud.

Batvielu grenyafa is solelasa is bulafa rupa greltgrelton remfir, prejana ko oblaka, sielon, remi kocaf mielcekap ke Mesopotama. Ayik fu soxonukar. Ban tisik, sovonewes, koe aalxo is azeka, merovilan, vielvielon va aytcura zaava fu sovumber. Nume odiaxaca, kivasa is ebeltafa, va kota kimtafa kerava veber, va lyumarapo gu kottan deswar, i va jebesa kiewatrakureva ke jotafa zaava. Krabesik, klokas va batcoba, va kulupafo nazbokafo baspezo mea rovebalbar, kan kalanzanu etcu va ticeon otsa ke koceem trasir. Tir decite ilana ke rumeafe sane, i sorga ke tena ke tamava, ok rotir trobindara ke kerik ke indiafa meila.

Nume, golde bata polera, kobrasik piron toz atayed, va atay va awalk tujden gan katcilajik, i va atay va mielak gijarotif loon

dam koceem, i va mielak koartokatas is vumbetes va tumtafi afi, i va draydes tey.

Kotlize, poke antiafa coyunta, mezekasa is tuwiputaweyesa brucka ke koswavanik zo rokakeved, amlitik va sint vanmia grelt dile tutcastad ise va mayakafa klokara kareizud, i va Nom ke vanfis Mielap, i va ilblis Awalt.

#### **IV : Baxun**

Okie, batugale, Baxun blir, i volunaykikye ke Ptux staba is berik ke Zaxelal taneaf gertapik. Mali yugal, va alizmonafa blira al bulur ise va listafa antiuca wale balemoya venta koe blikiraf sakam al kiblar, lize dankasa aftuca ke klita vokewer. Pistokki va inafa titickafa broca tadled, i va gulikafa oga. Keuca is pomara ke yon jaftol isu okol va sivakuca is cug belaf warolaks al daskid. Inaf balemoy kurenik is bar-sanoy nazbeik blid inde koe fuda co-tigid.

Baxun va yona manafa rieta er. Kabe tarkara ke Zaxelal grelt va taneaf berik ilamtaf gertapik, pune zo co-raporgayar.

Taneon, er da deblitafa blira tir kiewafa loon dam alizmonafa blira, fromeson va ayapo ika swava ;

Toleon, trakur da Awalt is Tael is kot bitej me tid lorik vols afiak ;

Bareon, trakur da ayik va wazdeks ke Sabera anton gofolir.

Zaxelal greltik va diolafi roti pu in yofted, ise konak rulokik, dile, laxuruped. Someireglied. Lantan al welidad da in, ziliwaleson va bliga, va volkalaf grelt jontikviele al pomar.

Okie ba ebeltaf bartiv, viele kexafa kiblara va jovlera va nazbukafa coyunta lodam vilara ke banyona volrodeldaskina lorinda, awir, pune grelteem va Baxun modovad nume dace miv gertik, arti intotcafa lyumarapa, va baroy zolonik ke sinaf veem krinad.

Baxun va negeem wesidon kalterektar, volmiv tolkalir, jontikviele is elimon biber. Va kobrasa tolka erur. Artion, opelon dakter da va vayara va tazukinda fu ektudar.

Grelteem zo agalemer kire al pokoler da Baxun va coyunta diweduson di rotunuyar. Soe okilik vanyed kalaf gu inaf goraks ise va yona zolonaca poked.

Batvielu, Baxun poke Ksur aalxo va int player, buluson ba tilderugal, vox kotafizcekon dizveson, moe tel lokaliaf okol ke Kalda. Fure, buiven gu louca ke inaf cuisaf sulem kare beta tuzafa tazukinda, va volnik ke ayik laoon is pintoton toz rovayar. Abdisuterafa nevapa dem per-sanoy dov tir daskiks ke bata inafa vayara, i tela lolistafa raporafa neva iskemayana gan alizmonugal pu wita zaaveem.

Koe bata neva, gomafelana gu inafa keafa dizvera is pufuca, blirabolk voltoltavaf gu sulemaf bliind isu ruxaf zo rabater, lize Baxun dulkon welidar da va tela rilafa laviuca isu kevak anton al rodrunar. Belison va bata pimtara, kot ayik sosuster. Baxun va batyon tisik gu Xipehuz voltar. I va yona fentalafa pinta,

mekon turibiegarsayana, icde sinyona tegira is sinafa nirinda isu lyumarinda isu nazbalkera, razdana gan bat guazaf sutesik, bata kotcoba danedir da ayazaava ko mekak riwe al jiadawer, da tawava vugeke al divvawar da di co-tiyir kiewega ke lan bliind minon volrotenvan.

Va cuisaf kalfrancavaks ke Dessault W- gobelit, i va inyona mekeyena kosmara icde abdiassurafa avopa, i va kosmara mafelana goxe loon dene divexo ( koe Germana is Engla ) dam dene inafa guga. Bat tcumpaf grupeik va yoni wexayesi krentki ke tciamaf suteks al djuprobeitar. Va sini pu saneg valeveon firví, nume sini va djumexulera va ilamtafa neva ke Feliik rotir daskitid.

## **V : Male neva ke Baxun**

Xipehuz tire tid blisik. Kota inafa askirinda va kuranira ik rinta ik gesiara ik pakafa volruptesuca karavar, i va kotcoba soltrakusa va sulemaf tisik gu ruxa ok foyokafa coba. Beka inafa nirinda doluneson me rogotur ( opelafa kildera moo sid ), drikon rowit da in eron vodjur. Levgon givukir, va onkara va milaptik giliper, toltolon ok barbaron gigozar, va gedrafa abduaibara nedir, va kon dositik gilisker aze va ar kazokever. Va aal me grupurper, vexe *guiveson* kan merokosman mergil va zveri grupatar. Bat tisik va aalxof sulem gilivamudad oke kadime amna giked ; kotviele atad aze troked. Va vexe roruyet da *va kot sulem mesolwison sokatad*, ede rotuzad, ise va batcoba dandackiskon askid kire me raweyad, voxo tuguboyackad.

Sinafa trokerinda va mek teyak sodiner : omavafu baponu va bata sopura sostaper. Sotre sanoy ok tol-sanoy, aname atayan sulemap va sint ivamukoron gikatanad aze va yona olya ben niskarenta vanmilenidasid. Icde sulemam ( tulong zveri ), olya ke tanoy Xipehuz tisik ta tuguboyara sostaper. Katcalat da rowarzen idul me tir vere tizaf. Va olyara ke Xipehuz tisik ben nuba jontikviele al kazawar aze alma anton vanion toz tuidulawer.

Me grupé kase rokalit da Xipehuz tisik tir dem gedraf tazuk kire kot va int gu fey az akinta az bada robetar, ise batcoba bal tanoy afizcek. Sinafa kseva dun arapenir, ise folí da batcoba gu artazukereem ke afi mali gazda kali siel az mali siel kali gazda jadion zo royofter. Wori konak arapenis nideks va rinta ke olkik is apton sinyona skeura nudaned, tode rokalí, nume va geltrafa altozafa muxara batinde tadled, voxe nekev lujafa vayara, va telyona lodopelafa anton sazason al rogotú. Tulong, va zides nideks gu zijnaf nideks meviele al rosolwí. Mancoba efe cotiyir taneafa mana kosmara.

Va sinyona *skeura* al kalí. Abdion va sinyona abdualbara ixam al katcalá, i va sinyona *naca* inde coyoltá. Va yona *bogara* dere sodikid. Lanbat Xipehuz tisik va lanban kotviele sokilnir ise waldon. Sinyona zidera nutid tizafa. Sin va sint klantad milinde rodizvet viele va sulemap ok ayik dilfud, ise bata doaliera pu jin al taved da mekon sotid volawalkolaf voldum taneon djuprofoliyí, lecen tolon ok baron va Xipehuz tisik xonukas bal manyona kakevera al wí, i va xonukas trabe *lubes* az *licawes* az *turaporawes*. Va konakbata abigafa awalkoda tciamon al vidé, nume va kosmara va tuwava ke

Xipehuz tisik dire rotir rozanudatad. Sina tid blafotamaf vewuk mebelon deraykayan is umicakiraf gu faltafe tride.

Larde Xipehuz tisik sotid awalkolaf, al maltrakú da va sin ape rolyumat ise rocenet, nume va enk dem lyumasa bagalara fure pulvitina re al boká.

Larde Xipehuz tisik sokayewad uminde reme danca ok dace kadime ulimaf zo rokozwid ( lecen robudapa va sin kotliz malstir ise gu intafa vannira walzer ), pune va int ko aalxo konakviele al rotarpumá, dirnusun va kaliuca ke jinaf okol.

Batlize, al lakosmá kase va brava pu int givegedud, vexe welidá da batenide al rodjé. Va rapor is ruxa somelizid ise nutid ezef gu kota *kramafa* is *rowina* rabinda, i gu antafa raba ayon dizvena. Acum va meko ervo dadid, sugdalon gu ewa minon gaana. Arse iluon me rotatad : kot sulem royategayas *meuzayanon* gan Xipehuz tisik va int al giwodackar, ise jontikviele al tí vrutasik va batcoba.

Milinde Pcexu volkalaf grelt ixam al katcalar, va lanyon rietavaf karniz somekaiknid ; batkane sinafa tegira zo kimar. Vexe bate ninke tandatandon is aksataksaton tire al divlized. Va lazava al gonaneyá.

Okie, bata lazava anton nutir bifa va *dofa laumara* ise, dum cuga Xipehuz coba, tir merogildana gan ayafa gruuca. Klioton, batse mwa : kima ke Xipehuz tegira baxakon gu ota ke tisik sotumantar, trabe vielu bliara va warzaf tisik tir, pune divlizera va jowa dere tir ; vexe liedje ota me betar, pune kot tisik va irubaxo gaano pu zaavikeem gan cobapo ( ? ) vol rodekaiknir.

Bata vexa, va doskeda wal flava is tisik koekafa loon dam tela gundafa katcalana dene ayikeem is sulemeem, ronowimir. Walduca ke bata mwa stekeon al zo wir, lecen vielu Xipehuz tisikeem illaumar, pune inafa jowa baxakon sokablar.

Icde bifa va bliara, va abiccoba gokalí ; vexe bata abiccoba tir adalafa. Taneon, bata bliara balemon tandeon sosokir, levi egaki is volegaki, vox anton bak karapaf mielcek. Xipehuz tisik va sint barbaron katanad, aze bata lospa va tanoya nilon gatelana is fralekapkorafa tere tazukad. Mielcekon batinde zavzagid, is rielcekon kali mirasti ke Awalt. Viele va sint solparsad, pune klubaf is gantakoraf is *granaf* tazuk ticnid.

Bat tazuk vion tuekemawed, tupinawed aze arti sanká va int gu eribukaf fey ontinapaf loon dam Xipehuz milgik sokartazukad. Arti toloy aksat is konak viel va cugafa vonewera trabe tupinawera zomed. Tere, vanpid oltavaf gu ar ke intaf bliind, dem kseva arapeniwesa kare bartiv is saz is ilkafa rinta isu tazuk. Kaiki konakvielon kotrafa vonewera isu tupinawera, jowa ke tegira sotumantawed. Efe berde, abdi bata crakefa vula, va krileem ke jinaf kiewaf Kwat xuvayá aze va pemaxo kaikon exoneyé.

Xipehuz tisik va kona pesta rotir dir, vexe vol roruyé. Va milflife de ape dir.

Va tigira ke bet sulem ik loeke ayik ilupon sopestaler, nume batcoba tire bazer da inaf pestavileem va minaf iteem vugon lieke vodar. Meviele al wí da va ruxa gu sulem dojer, dace remi goaspil edje coenon gan levpidafi afi ik kseva ke plek ik inafa tirka maninde co-roklayá. Ta trokera va sulemap tol-sanoy








ektudad, voxe ta anteyara va zveri ant tanoy soviunsur, nume batcoba va gilderacka va olegara tire welidar, ise bata gildura nutir loon kotunafa dizvenon da kare brutafe pwerte ke wivga sotre sana ok san-tola ok san-aluba va sint lospad. Ison kona lokiewafa dusiva mu dira va vila gundafa gu kona minafa pesta ok sinafa gruuca, tir sinafa tegiinda viele va minyon grelt al dilfud, lecen inc va yona ayikya iku rumeik abiceke dulapeyed voxe va kot gejik volsaason onkayad.

Battode, tel zolonaf uum tir : kas grupavotud ? Volklabuson rodulzé : « Gue, grupavotud. » Ise inaf avot va yona sugda sodadir, ise va konaka dace al lajubasbeksá.

Guzekat, tulon, da kon Xipehuz tisik pu ar co-djupulvir. Batenide, va olyeem ke intaf bitej van dositik opelon govodjur, nume batcoba vere zo zatar. Lanis rozanik bam sovukir aze ker. Nume pulvisik va enk dem trelafa afistaa ben dace welma ke battol kalion soconyukar, kan ayewasira kotviele mal omava, aze bata staa abicedje beneon zavzagid aze relvawed.

Battol, moi ritama, sodulzer.

Inc abdinon gu koti lyumarategi oku skay Xipehuz tisik va batyona staa sokuned : . Viele va jin pulviyid, ise batcoba jontikviele lecen va jin is budaf Kwat dun lavanmecobayad, pune  staa is aryona dum tel vamoef ravlem oku  blayak zo sogoleyed. Rozasa gubefa staa tiyir  nume askiyir da kazawasik di vanvulteyer. Viele Xipehuz tisik gu jadifa katanara zo ganeyed, va staa vektasa va  is kaatoesa va jonbarafa nedira ke batyon tisik kotviele dizveyé.

Xipehuz tisik va lodesafa staa dadid, me icde kona tegira oltavafa gu minafa vols yona cugunaykacapa jinon merobasbeksayana. Va sinafa gruwaltrakura va soloksokorafa rieta ape milvodafa gu ayafa rieta vol etrakat !! Lecen jontikedje rozavzad mezekas, anton prilason, nume batcoba va bederacka va trakura tire soxer.

Jinafa tiskirapa poke sin al askiyir da tere damo artazukereem ( gaden gan vexeem amidaf gu kot sin num vofan gan trakulotaf ulijdasik ) va konak Xipehuz tisik koekackon grupeyé, razdambon va konaka pilkovaca icde ilkafa amiduca... i icde cwe adala ? Va konak snivik someconyukas va kona staa al grupé ; va konak kanespik sutes va dewitcapa ; va konak vetcoyesik isu guvaxiesik volant pulvis is va sint waljoas. Konak djukabuluyud ise antion djukabliyid ; ar va selt denon kaaneyayad ; zugik va snavol ik zveri dun tcabaneyed, ise segayesik va sulem jontikviele umbeyed, iskeyed da in dilion wan bliyir. Kas bata kotcoba va gulafo raporxo gu gesta me fenkur ? Kas me askir da va yona gedrafa dralaca gundafa gu ayafa zaava isu gruaca isu po rovorietat ?

Va gaara sokud. Va kon debanyes Xipehuz guazik ayewas va staa vanmieae jontik jotik fereon dizveyé aze bantan tantanon tolkaliiyd ise gotolaskiyid viele tolaskira tiyir mekotunafa !

Bata tavera tiyid bulafa sedme jin, nume meka arcoba ke Xipehuz tisikeem va jin loeke tuobrasayar, remi mekenibes mielcek loeke tudwisayar. Italk ke bula, bak bat vanafiz ke zaava, cwe batlize fu rofenkuwemeyer, kona opelafa is taneakafarieta batlize rotir di bimileyer ise va alavotsa ke bat mielakap mu jin fu koafiyir. Gue, mecoba va jin vogiteyer ; va

bata gaara konaktandon tcokeyé, va jontika remgrupera yovayá. Va presafa afidinda ke benelafa tuwava ke Xipehuz tisikeem jontikviele fogralombeyé, i va volropestalena afida, i va belikafa soloksaca, voxé kaxe jinafa kimtafa grugildara wizuyuna gu cot meviele lajuponkayad !

Pokion al kalí da jontikedje al foliyí da Xipehuz tisik sotir awalkolaf. Voxé oye vilara bata folira wiyison va konaka xonukara bak yona kakevera dene Xipehuz tisikeem, va sinafu robakanu u efe laganeyayá nume batvielu va kon vilas mergil kotvielon lasutrasiyí lecen Xipehuz tisik laumapayad ote, vani geon is lenton is talton kaiknira va Ksur aalxo, va azeka vane roneka toz kodubieyed. Kaxe arti abica doca, va ayik gu inafa tawavafa oga di co-divdigiyid.

Acum va int gu poxa ervoayá, aze, kotviele Xipehuz tisik va aalxo divniyir, vome poxasoluma, kulmeyé aze va poxaxa kabuyú. Va mek daneckeks batkane seotayá, beka va kot kulmen tisik gu kot pak ke sinafa welma don dace afiu zomeyé. Sin va jinyona zomera mekon nuvalmayad nume mek somangiyir enide va beto jinafo mimadjo taruteyer. Arti tanoy yovas aksat, pu int gowelidayá da poxa va mecoba kev sin sorotir, nume va bato ervo jovleyé.

Va tra nariyí. Ba jinyona taneafa kabuna tceka, va kivapasa pestaka dene cug Xipehuz tisik kosmayá lecen sin mangiyid ise kaike tcekasoluma zavzagiyid, cugeke taruteson va jin. Va kon anyustkon giopon lasuguzayá. Bak anyusteaf viel, Xipehuz lospa tce divburena gan intafa tcabanesa lujuca, onkason va listaf rayol pokoniyir. Ipeson tcekayá, seotason va *mek rabaten daneks*, aze lospa tcastaweyer edje wan onkayá ise va werk

ixalayá. Moida va ironokafa tceka al kabuyú, sin kotote kaliapon kotlizu dimniyid aze va jin cugon ivamudayad voxe tuke zultafa kaliuca ke laspedaf Kwat me xonukayá.

Bata stuva va cuga melanera isu pokolera pu jin iskeyer ; remi tanoya safta zavzayá foyokaf, eglus koe klubuca is aludevafa riwera, i koe rukuzaf skerses uum rotaloyas va moda is tukotras gu belcon meja is puve. Tokdume Xipehuz tisik va jinyona tceka kivayad ? Ison kasdume melo jinafo jointiko mimadjo uzayaso va tcabanesik va mek daneckeeks al daskiyir ? Jinon grupen pak ke gruuca ke nik va lazaviskafa eaftuca me rosazdayar. Volson, batcoba poayar da guzekayá da *tceka*, kabuna katecton gu pilkovaf gropeem, ape tiyir crakefo ervo kev sin. Voxe bat gropeem tiyir tok ? Robakanu u ke Xipehuz tisik tiyir toku ? Bam levgon trakura fiyir da *bitej* sotir gotuzan. Tanwexon laneyé, skeuson is mewison. Azon ilfoliyí.

Kas kan poxa, konakviele, va bat mukot me al kulmeyé, me al uzayá ? Tokdume tceka co-tir fikuntafa loon dam poxaxa ?...

Okie, tiyir miel, i volrosaben bup, i intyon ribiegaf gum plen vamo tawava. Ise jin, ton taka koe nubeem, klokayá, ton takra mielakafa loon dam miel.

Krapol toz ieyer, nopalol koo azeka laniyid, voxe gire pokolesi afimi va jin koafiyir. Su trakuyur da poxaxa tiyir pwertackafa voxe Xipehuz bitej pinopapaf ! Rotir, ta keskotuca, tisik zo govanludevapayar ise kan opafa tceka zo remruyur nume bam inafa eaftuca lente tceka pebuweyer !

Wori Wega vamoe nael vion sokanameniyyir, vanafiz tiyir

boref, ise leguca, remi konak bartiv, koe jinafa kerava va tamava ke swava komodayar.

Bak konak azaf viel, ervokiraf gu tra, va Xipehuz tisik dun onkayá, ko sinafe anambe ilon lieke dam proyuca noveyer. Vexe kot va jinafa dilfura taruteyer, sumeon tigison, kaike tcekasoluma. Me roguzekayá da va int di skayeyé, lecen sinafa zatatca noveyer da va jinafa tigira reme lirk roderabateyed.

Moni tena ke alubeaf viel, bifa sokiyir, miv welidatasa da Xipehuz tisik sotir rokonjes is rotukiewawes tisik dum ayik. Batsielon, nomon, Xipehuz tisik va jin ins vanniyir, kan bata kaliuca dure laumasa gilikatcuna ta dilfura. Akoyen, ton sionasa takra, va tra nokeyé. In, abdunison, oltavaf gu folvukafa briva koe awis siel, kaik soluma riwe artniyir. Azon, edje djuprotcekayá, woltendanon wiyí da in rwodeyer nume ware abdunison va bitej palseyer. Bam va Kwat biwe rotcepasiyí nume va uzara ke bat crakef kevelik krulayá.

Okie, bata tiuracka numodovayana gan mek Xipehuz tisik, valeyda va ilkafa gandura ke volnik isu ilkuca ware danediyir, va toloya rieta tiaveyer : taneon, va robakanuca ke Xipehuz bitej bexe ebokon al ovayá ; toleon, leon bristunon, ede mila pendanaca gan kottan zo co-vanikatcur, pune va jinafa lagara di co-tuwavdapar, dace rotir merotison.

Wori, kaiki jontika sugara va kosmara va ageltuca, pestaleyé da jinafa takreluca lent vakor laumayar ise va rukuzuca adrafa gu vetrovgara kan jinafa swava rovepokoleyé.

## VI : Toleafa rekola ke neva ke Baxun

Ko intafa antiuca dimlaniyí. Anaxre, bareafe nazbeikye ke jinaf Tepai yerumanik, tiyir gijarotif ervoiasik. Benplekuyú da in va tra zulton rodekabusa di ilbodeyer. Va gama ke *waxam* aal, olgafa dam azil, nariyir, nume iayana tra tiyir gijarotifa balemon loon dam tela ke Zankan vartesik, i ke tel lopof tcekasik ke decitoy grelt. Mel blis ayik va ina corodekalatceyer. Vexe va tca al getcayá nume larde Anaxre nope jinafa trakura al kobayar, efe bata datafa tra gan ayikya zo rokalatceyer.

Okie kotvielu tiyí bagalaf gu kabura va flexa is tceka, maninde arti konak viel va ervo iayano gan Anaxre nazbeik kotunon gruragrupeyé, nume va mek mukot di keluyú, i va dace kon tiguaf dum nefta ok kon talas kalion lion dam flaweza.

Vanion, ko Ksur moe Kwat dem teykas iteem gire lakiyí, aze aname volnikeem ke ayik gin mwarneyé.

Enide tudir nusayá, kotviele kona sinafa lospa va jowa vanniyir, pune kan jinafa gubefa tra jontikote tcekayá, voxé tceka tolke vom sin lubeyed. Sin va tageltafa ervosoluma batkane tavuyud nume en foliyid da iyela vome lana titickafa soluma anton tigiyr. Wori, va lana budaxara videyed, i va zekasisa is turintasa edje izgon ice aalxo men tigiyr, nume va bitej gu jinafa wira wan palseyed.

Kepeyeson, va sinafa guyuca tulegayá, aze, ba teveafa gazda, lent jin valev duelapa arte baroya trasolumacka milk va int player.

Va mefavlaf tcekasuray vere stakseyé. Bam, sinafa obrara loloon komodeyer nume nira tunuyaweyed lion dam bak toza ke jinafa tiskira.

Tiyir gorukaf bartiv. Jinaf ast buupuyur eke taneon pesteyé poiskaf. Keyé, lecen eroyaf direkeugal va tanoya tceka rupteyer. Ede bata vol co-lajupuzar, rotir mevieli Xipehuz tisik zo co-djuprobagalatad, nume battode, tokkane co-rogrupeyé kase kona ayafa vordava va sin sobakar ?

Wori, abicabicon jinafa kuranira kultuyur, va ast stivayar, va beweem tuplaxayar ise tupoayar, va etcu tualayar. Bam, va tra ke Anaxre, vion, madayá. Banlize, ileon, smilkfeyap izgon ice aal mezekason tigiyr ; inaf sizuntas bitej van jin rwodeyer. Granafa tra atceweyer ; ko rid tceka azdason malniyr... aze Xipehuz tisik, uzayan, *lubeyer* aze *licaweyer* ise *turaporaweyer*.

Mamtafe ie ke kultura div jinaf ast bimileyer. Masotceson, wendeson, va Tanik grewayá.

Kle, sin tiyid robakan gu ayafervo, i bat mayakaf Xipehuz tisik ! Ropokoleyet da va sin di rovilayat !

Bam, mekivason, iskeyé da jinaf ast buuyur, iskeyé da saipafa lexa mamayar, jin gripolepeyes va rekeugal ke intafa zaava, jin, valeve remnira ke koceem is faltaf vewuk ke bup, jontikviele patavayas da bal tol-decemda datafa tamava kev Xipehuz tolgenira va twawera ke intaf kimeem co-pestaleter.

Voxe wori, viele alban Miel gin stiyir, i trakus Miel, pune izga mo jinafa tierduca lubeyer, i mo niga icde voldokrudera ke

ayik do Xipehuz tisik. Icede vanmecobara va bantol gotitisa volokafa kreda ta blira ke battol.

## ***TOLEAF DOV***

### **VII : Bareafa rekola ke neva ke Baxun**

#### **1.**

Gertik is guazik is okilik va jinafa nega skebunon al terektayad ; otson ic beto antiaxo vultesik va warzotany tolkaliiyd. Pirdotap benplekuyur da gejik ba teveaf taelcek ke 22649<sup>e</sup> ilana koe Mesur Asar va sint di katanayad, ise katcilik va baerdafa geja tujdeyed. Lo vunttoy Zaxelal gejik vanvulteyed ; jontik lyumasik ke ezefa zaava ( Dzum is Sax is Xald ) jekun gan sposuca artlaniyd enide va bat cosap di pomayad.

Ksur gan sanoya tcekasikafa ema zo ivamudayar, voxo kota tcecara kev Xipehuz pendanaca tineyer, nume xeyaf gejik jontikote xonukayad.

Bam, remi konaka safta, eaftacapa dene ayafa ervolia abdivodayar...

Ba bareaf viel ke anyusteaf taelcek, ervokiraf gu wed dem gemaf uul, pu yone meropatane sane dakteyé da va Xipehuz tisikeem ant fu lyumayá, pokoleson va vilara va budaxara awisa kev ageltuca ke jinafa nega.



Loum is Demja is Anaxre, i nazbeikye, va jinaf goraks tizon tsuneyed ise va jinafa runda me djunariyid. Ise Loum kaliyir : « Me rolanil lecen ba rinafa xonukara kottan folitir da Xipehuz tisik tid volrobakan nume ayazaava di xonukatar. »

Demja is Anaxre is jontik okilik milinde pulviyid, ise krupteyé da bat karolaks tiyid malyaf nume buluyú.

Bam, Loum va jinaf wed dem nolanubelt konariyir aze va awalkolafa jowa remlaniyir nume Xipehuz tisik kaliapon vanniyyid. Tan wilupaf loon dam kotar, fu uzayar, vexe Loum rukuzaf loon dam kraitimol mangiyir aze va Xipehuz tisik anamlaniyir aze welvupuson kevlaniyir ise va opafa nubema flexayar.

Mezekase sane wiyid da kevelik atitsuyur aze licaweyer ise turaporaweyer. Vuntoya puda va faltafa gazda ticstiyid, voxe Loum ixam dimlaniyir aze va jowa vomlaniyir. Inaf aliaf yolt vanmiae ervolia priduyur.

## **2. Taneafa meldara**

Bak 22649<sup>e</sup> ilana ke tamava, ba pereaf viel ke anyusteaf taelcek.

Ba vanafiz, azra mamayad ; gamiafa myelga va iyekotafa biota ta meldarapa tazeyed. Decemoy ebeltaf ayadol is tol-decemoy okol gan gertik zo vikeayad, ise alub-sanoye nazbeikye do jin va Tanik blikeyed.

Awalt winta ko kerafa gazda koartokaweyer, okilik kabdue ervoliaredjel tcepayad, kizoyura ke dilfura do trucafa vultera ke vuntoy lyumasik laumayar.

Nazum grelt, taneon, va volnik domuyur aze luymara tiyir pelkafa. Tore axaf is dolisten gan yona bulafa vordava, gejik fure raveyed kane va Xipehuz tisik godendayad ise rovilyad. Bam, kot cos ( Zaxelal is Dzum is Sax is Xald is Xisoastre is Pcarvan ) buus dum welfa, va azeka is aalxo belcon tolgeniyid aze va amlitaf kevelik kotliz ivamudayad.

Jontikedje meld tiyir krogaca ; staksik dun artlakiyid aze pu gertik givayad da ayik decemdecemon xonukayad, voxé sinafa awalkera zo jaxadayar.

Ba anteyas bartiv, Sudar nazbeikye dem tuzaf nugeem, stakseyene gan Loum, piyir aze pu jin kaliyir da, sotre kot vilan Xipehuz tisik, tol-sanoy minik xonukayad. Jinafa gloga tuebeltaweyer ise takra tupoiskaweyer, aze jinaf kutceem prejayar :

— Coba tir inde ant Gadik kuranir !!

Aze setikeyeson da otara va gejik va vunt-balem-kune woda al naavdayar ise grupeson da Xipehuz tisik tiyid mon balem-decitoy, trakuyú da bareacapa ke datafa ervolia su xonukayar, voxé tawava va ayik di pasuyur. Okie, goxe ervolia rotir me di stapeyer.

— Kle tir cenera ! ~ gabenton prejaya.

Vexe edje va batcoba modovaya, pune kizoyura ke meld va

aalxo lophon skotcesiyir, aze, flavaflavapon, gejik dimawiyid voxe kot van giwasa jowa faxieson otceyer.

Bam va Xipehuz tisik wiyir, sin va dom artniyid, mea mebelcon dum gazdon, vox ton ivamufa lospa sotre tolsana is vodjus va intaf tey van istak. Tuke bata tirka, merobakan, van minyon voljupekas gejik abduniyid aze mayakon stakeyed.

Tiyir surterapa.

Lolaof lyumasik va otcera anton modovayad. Wori, nekev sugawalkera tuebeltasa va jinafa gloga, va baliyf fiukeem keon dizveyé, djupotrasison va kona wayotera va mana xaka, lecen jort is kevjiva jontikviele keveon sokirubad.

Bali va jin gu toloya kosmara yoke bata dirnura va undera gableyer. Taneon katcalayá da lize minaf grelt jontikote tigiyyid voxe Xipehuz tisik abicote, pune stakera, taneon meropatana, illaumayar darpeda vordava ke volnik leleon uzayad ise jontik dendanik moi liafa spikonara madagiyid. Tel loprantaf va gla tere dace cugeke acagiyid nume nekev yona tolaskina dilfura wan otceyed. Larde konaklize moe meldxo mila wica konakviele dilizeyer, pune rovezolteyé da Xipehuz tisik toz cueyed ise sinafa vilasa gijarotiuca va lana kima me kaikfiyir.

Toleaf katcalaks fikunton tukotras va taneaf, gan Xald lospa zo deayar. Bat kimtaf korik, iste jontik volnik, ilfolis va intyon wedam, va luc divsidayad aze gu flavoda zanieded batkane lasuremlaniyid. Batcoba va jin akoyepeyer lecen jupekayad. Va Xipehuz tisik tuvolmilbavawes yoke yona vordava sotre santolda, is mon lik ke Xald ervolia divvawas rem fenkune fe,

wiyir. Vexe inc, manaca, lyumasik ( tulong konak okilik ) zanyes va iyekotaf gor lodam luc, alieson va volnik va int tire atayad. Dere gokatcalat da flavodara va Xipehuz tisik bakansayad lecen lubeyes tisik kotote wiluon madagiyid aze gin onkayad. Va jontolaf kosmaks gu zolonacapa icde direkefa lyumara soe torigiyyí.

Wori surterapa wan dilizeyer. Cenenikafa otcera va tawava taulesiyir ; abdi siel, vanmiae Xipehuz ivamu, minaf xonukasik is konak decemoy lyumasik tice aal anton zavzagiyid. Bali ke kot bantan tiyir eaftafi kire gan Xipehuz tisik avplekus va kunoy tey van bravakiraf gameem zo anteyayar. Remi konak bartiv valeve keltap, sinafa mayakafa iera tauleyed.

### **3. Baxun zo dasugdar**

Direvielon, sane va moblisik otayad. Droka ke bat meld efe tiyir vas mon lerd-decitooy ayik ; utcorafa gunestera bazeyer da tazdaks ke Xipehuz tisik tiyir vas tev-decema. Battode xonukara ke kot volnik va san-aluboy ayik al tapileyer.

Gripokolera koe takra inkeweyer, jontiktan va okilik ienayad ise va mayakafa tegira djujovleyed. Batviele, prejambon, ist pemaxo abdulaniyyí aze va nyukuca ke gloga pu gejikeem toz culimepeyyé. Eruyú kase min isket da kot ayik di xonukar vode lodame va pak di wetat ; danediyí da arti sanda Zaxelal coyunta gan tazukindeem di zo tolgeniyir, az arti tol-sanda va Xald vo isu Sax isu Pcarvan isu Xisoastre ; aze, batkane divmodayason va sinafa jiluca, jupayá da dosteyed da va teveaca ke crakefo

tawavo ixam al dimdigiyit ise volnik ko aalxo barkrilon al zo malplatiyir. Adim va jinyon dizveks goleyé, jupayá da gildayad da Xipehuz tisik me tiyid merocuesin ise intaflavoda rotrovgayad nume sin va robakana kerdela di govedivnediyid.

Amlitap moe azeka gazayar, pokolera va jontikote terektas gejik gin denfiyir. Ise ta laumara va dirnura, va konake gestane de kum inta pimtayá, i va de ta belcon dilfura is rojura. Seramuca gin mopleweyer, sane va jinafa pulvira permuyud nume okilik va intafa dirgara tit jin rundayad.

#### **4. Artazukera va ervoem**

Remi konak azaf viel, va aal jontikote volmiv balieyé, ise va teza va bagaf roburen karniz ziliyí. Batse fliotafa pimtara : orala dem abrotce vas peroy ladavacek is mante vas toloy, gluyana gan konak oblay gu koefa orala dem mante vas tanoy ladavacek is abrotce vas aluboy. Tevoy ayik ( toloy buresik is toloy gejik ervokiraf gu avinkafa intakabapa is toloy ar gejik dere dem intakaba vox dem gemapaf yantuul, is kottan ison paasleyen gu tra is tceka ) waleon delvejon rotigiyid ise, bravanon kev davafa gla ke Xipehuz tisik, ko aalxo rolaniyid. Artlanison va solumacka ke volnik, gejik dem avinkafa kaba godendayad ise gotrovgayad ise gopoayad da volnik di nisawer, ise kabakiraf tcekasik va bitej kan kaba ok tra sedme goaspil gokulmeyed. Oye mialukafe rane ke Xipehuz tisik va tanoy ladavacek is acku kaikfimiyr, va karnizeem deraykayá inde bak lanira divefa orala va ontine vas tanoy ladavacek is amu vamoe sid me kaikfiyir, nume batenide blagarama va levburexeem gluyas gu

koefa orala burena gan nuba stapeckeyer. Larde ison Xipehuz tisik va guraf lirik me gruticnir ise anton ranyeson grupabdunir, pune ta gelbera kev sinyona davafa dilfura karniz batinde envayan stapeyer. Efe, sin va minaf warzaf ervoem di lasuganteyayad, nume konaktode di jupekayad, vexe larde sinaf tey sotid keskotansaf vome minafa tcekasoluma, ta lakoteyara di gonisaweyed. Ostik, larde mana sotir meverefa, kan kaliafa laniratiura loviele di rodivvawayat.

## **5. Toleafa meldara**

Bak 22649<sup>e</sup> tamavilana, ba san-taneaf viel ke anyusteaf taelcek. Remi bat viel toleafa meldara kev Xipehuz tisik dilizeyer, ise okilik va ilamafa dirgara pu jin al deayad. Battode va saneem gu baroya ervolia solzarteyé. Vani vanawalt, va balem-kunoy gejik ervoayan sedme karnizaf bolck. Bata dilfura tiyir gojafa leon dam tela ke pereaf viel. Grelt, sotre milk vuckunon deraykayan azu milk, va aalxo vion kolaniyid, aze kakevera tozuweyer. Remi taneaf bartiv tiyir gunton gu ayik larde Xipehuz tisik gan warzafa pendanaca zo xayeckeyed ; loa decemoya tazukinda xonukayad, ika biwe sanoy gejik. Vexe, radimi akoyera, Xipehuz tisik va karniz lasuganteyayad. Konaktode jupekayad. Moni balemeaf bartiv ke afiz va loon wupesisa tiura vanikatcuyud : impavantason va intafa kaliuca, Xipehuz lospa va sint licas va karniz kevniiyid aze lajutrovgayad. Batkane ayik jontikote xonukayad maninde pak ke minafa ervolia gripokoleweyer edje volnik gin vanwayad.

Moni alubeaf bartiv, Zaxelal grelt ke Xemar isu Djox is pak ke Xisoastre is Sax toz otceyed. Djutaruteson va egale, va konak ewaburesik nendan gan pof karniz stakseýe enide sin va artlanis iljoasik di dakteyed. Miledje va dilfusa toleafa ervolia deraykayá ; vexe va yona warzafa kalbenplekura levion deayá : karniz ton lospa ekemafa lion dam novena pridura koe aalxo di zo gonubegayad, ise ba vannira ke Xipehuz lospapa va int ton elkaf lujor di goderaykayad, vox mejovleson va dilfura.

Moion, va sugda deayá ; abicedje bexe wiyí da cenera va dotanayan saneem vanfiyir. Adim, mon isti afizcek, vanpokefa otara bazesa va tazdaks ke minafa ervolia vas tol-decitoy ayik vox tel ke Xipehuz tisikeem vas bar-decemoy, va skuyuna abduxa gorukon nediyir ise va kota gloga gu dirnura tukotrayar.

Soe, volgunton gu min moni san-balemeaf bartiv baxak abiceke arapenyir, ise batviele saneem va balem-decitoy olkik al tazdayar voxe Xipehuz tisikeem va alub-decemoy.

Kle bam va bareafi ervoliaki komeldayá : meld va cuga nouca artfiyir, ise seramuca ke gejekeem verastveraston laumayar, vieli awalt ko roneka su lubeyer.

Mon batvulon, valente Ksur Xipehuz tisik gin dilfuyud ; dimelanira ke Dzum grelt isu Pcarvan va jin tuguyayar. Ostik malyedason da miel di tiyir kuvaf gu volnik lodam min, va meldtena volmiv mamleyé. Dimlanira ke milkeem vumelton dilizeyer, moceneson ; remi cugak ke mielcek va kiewatca kotgrupeyet. Ina tiyir torigirafa : anyustoy Xipehux tisik al zertuyud, sinaf tegis poz gu toloya bareaca ke Ksur al zo

kastayar. Efe aje va per-decitoj minik koe aalxo iskeyet ; vexe bat tazdaks baxakon tiyir omackaf leon dam daneks, i dam tel ke taneaf meld. Acum, pokolepeson, va azed va logorukafa dilfura va tol-decitoj Xipehuz tisik ware blis bam rovebenvayá.

## **6. Kalvilara**

Bak 22649<sup>e</sup> tamavilana, ba san-alubeaf viel ke anyusteaf taelcek.

Viele kerafa koca va taltefa venta uzayar, emon ice meld kabdue Ksur saneem tigiyr.

Ton gloga dem pokolerapa, pu okilikeem tere pulviyí ; aze azra mamleyed, gamiafa myelga mo iyekot tauleyed, aze taneafe ervolia kev aalxo avlason laniyr.

Okie, karniz tiyid lopof is logijamaf is dadis va san-toloy ayik ika tevoy, vaxe mon bareaca vegeduyuna sedme abdifa envara.

Batkane anteyara va karniz isu trovgara tiyid loon wavdafa.

Taneaf gemelt ke meld tiyid fikuntaf ; arti bareaf bartiv, balem-decemoy Xipehuz tisik vox anton tol-decitoj minik al zo awalkopeyed. Bristun gan bat warzotany, va toleafi ervoliaki kabuyú. Sintafa elodara batvielu tumayakaweyer, minaf lyumasik va xultura giltaveyed voxe kevelik va trakulotuca ke olukaf bliind vokeyed. Mali balemeaf bartiv kali anyusteaf, va loa kunoya blira wetayat ; voxe Xipehuz tisik gu decitoj sinik



dodeyed, maninde decitoy iste istak ke Ksur anton zavzagiyid.

Batvielu gildayá da ayik va tamava di digiyir ; jinafa ironokafa guyuca vandiliweyed.

Wori, ba lardeaf bartiv, izgapa mo minafa cenera awiyir. Batgemelton, Xipehuz tisik ko senta ton granafa flava va int anton nediyid, palsezon va intaf bitej, nume trovgara va sin riwe tumerotisaweyer. Tubliskas gan meldara, jontik minik va batyona flava ipeyed. Nume moion, arinde wilupon nison, pak ke Xipehuz lospa mangiyir, trovgason va jontik rulokik iku stakeson.

Tan-decitoy minik batinde xonukayad, voxe abic tisik dene volnik ; wison va batcoba Pcarvan iegayad da kotcoba tiyir artifa ; radeyera abdivodayar ise va lo vunttoy ayik yatesiyir, ise dace jontikote pak va karniz volproyon jovleyer enide loon kalion di ilvulteyer. Kiblaraja. Mon decemoy onkas Xipehuz tisik va lo tol-decitoy Pcarvan ok Zaxelal saneik balieyed : kovudara vanmia minaf emeem toz divlizeyer.

Viele ewavultesik va bat awalkedaf warzot ve vanbureyed, gildayá da vielcek di co-tazdayar ede, kan kona kaliafa tiura, me di co-jupekayá da va tazdayan tirkeem di dimnariyí. Vere, va dilfura pu okilikeem ke bareafa ervolia volmiv benplekuyú, ise dakteyé da fu dirgayá. Azon, va bat kevsuks vanon stayá lizu otesik artlaniyid. Lent Xipehuz onkasik fure tigiyyit. Sin dolizin gan atasa lujuca va sint kalianson dimlospayad, nume, abicedje zo anamplekuyud : abicote di divvawayad ; datafa vankievera ke cenera va minikeem gin bristuyur.

Batvielu va diltura volmiv drikon toltazukayá ; minafa tiura kotviele niteyer da va ki gu volnafa lospa solparsayar aze anamplekuyur aze kalvilayar.

Fure, envason eke bata pendanaca tiyir volfikuntafa, Xipehuz tisik va min kan lospama gin lyumayad, nume stakera va toloy bliind mayakon laumayar, voxe tanoy di rokruldeyer, vanmecobason va toleaf. Vexe kota volfolira va tenafa cenera va beta nyukafa gloga divfiyir. Moni san-balemeaf bartiv, biwe alub-celemoy Xipehuz tisik vox lo vuntoy ayik zavzagiyid. Ison bata kevelafa otama koe nilaf gabot ke aalxo tigiyr, i koe mon teveaca ke Ksur aalxo, batdume minafa tiura re zo tudrikapayad.

Wori, nom ton kerafi afi rem aala vantraspuyur, nume kivason va skayna ke izga, va lyumara volmiv waljoayá.

Datuca ke cenera va kota gloga warlayar ; okilik va nafalara va saneem pu jin djufirviyid. Pirdayá da bali ke ayikeem pu kintaf rotines tisik zo somenafer volse Tanik zo sosonter ise Proyuca gu tawavaf okilik sokiblar.

## **VIII : Ironokafa rekola ke neva ke Baxun**

Tawava va ayikeem sopasur. Toloy lyumas vielcek va Xipehuz tisik kalvilayad ; gabot kereleyen gan sinaf ironokaf tol-decemoy koton al zo tipokeyer, ise kot aal isu ruxa isu werdolk al zo balieyed. Ison ta kogrupedara va direkef saneem, poman gan Loum nazbeik isu Azax isu Simxo, va sinafa izva

mo wankazeka al ten kosuteyé.

Re antion tigi, drume Ksur, koe zwaf miel. Lutukafu taelacku vamoe Roneka tigiyr. Krapol van bitej ied. Bost vanmiao dzopoka vion lutcer ; inafa kotabafa puda va fis ugal is kexuca ke awalketesa coba sokareizur. Ise va jo ko nubeem al palsé, aze tema va takra al titufir. Lecen, larde Xipehuz tisik al zertud, jinafa gloga va sin batcer, nume pu Tanik erú : toka balima jupayar da pisonas Mielak va cuisuca ke Bli al kaldecenar ?